

## Prome Minister Mike Eman: mas energia sostenibel, menos fuel oil, miho calidad di bida

**ORANJESTAD** – Minister President Eman a tene dos reunion importante un tempo pasa, pa loke ta trata e facilitacion di acceso di e ciudadano na panel nan solar pa instalacion na cas.

E prome tabata cu representantenan di Elmar N.V. y Utilities Aruba N.V. caminda el a wordo informa cu cada bes tin mas cas na Aruba cu ta instala y haci uzo di panel nan solar pa genera nan propio electricidad. E di dos ta cu un organisacion Hulandes yama 'Het Energieplein' ta interesa den realisa un asina yama 'crowd financing' caminda ta pone fondonan pa fia ciudadano cu kier pone panel solar na su cas.

E interes di e organisacion aki ta entre 4 y 4.5% ta casi 3% menos compara cu locual e mercado local ta ofrece actualmente.

"Esey ta haci cu un inversion pa haci bo cas totalmente sostenibel cu energia solar, cual normalmente tin un 'Return On Investment' di mas o menos 7 aña pa yega na e punto cu no ta paga pa ningun cori-

ente, ta baha cu e tasa di interes preferencial aki te entre 4 pa 5 aña. Esey ta algo grandi," Minister President Mike Eman a splica.

E transicion di e poblacion pa energia sostenibel, banda di e proyectonan cu Gobierno mes ta implementando manera Parke Solar, Parkenan di Biento, Deep Sea Cooling, entre otro, por tin un efecto enorme riba nos economia.

"Cada dia nos ta pone un paso mas cerca den realisa e vision di un economia diversifica cu un miho calidad di producto pa e rendimiento bay na tur nos ciudadanonan." Asina Prome Minister Mike Eman a duna di conoce durante e bishita cu el a haci recientemente na e Parke Solar bou construccion na aeropuerto. E mandatario ta referi na e diferente proyectonan cu Gobierno ta ehecutando den direccion di sostenibilidad total.

Resultado di energia sostenibel

Premier Eman a bisa. Ya caba a baha e demanda nacional di



6 mil bari di fuel oil pa dia te na 3.500. "Y segun nos aumenta e cantidad di energia sostenibel den e totalidad di energia na Aruba, nos ta bay reduci tambe e necesidad pa fuel oil, mantene e reservanan na Aruba y percura pa

esakinan por wordo inverti den educacion di nos yiunan, miho barrio y miho calidad di bida pa nos hendenan."

Beneficio energia sostenibel  
E mandatario a reconoce cu e

escogencia aki cu su gabinete a haci, ta uno fuerte y cu nan tin cu para firme pe. "Ora nos a drenta gobernacion nos por a bisa cu nos ta traha 10 hotel mas pero nos a mira cu crece a base di e filosofia ey a pasa e punto cu e tin un balor agrega pa Aruba." Na su lugá Gabinete Mike Eman I y II ta opta pa inverti den diversificacion cu un economia di conocimiento y caminda tambe ta inverti den e calidad di e producto pa asina e rendimiento pa tur nos ciudadanonan ta mucho mas visibel den nan entrada, e calidad di bida, cuido di anciano, educacion di muchanan, ambiente den barrio y infraestructura di e pais. "Esey ta e vision cu awe nos a añadi un paso mas cerca di realisa," asina Minister President a expresa cu satisfaccion. □